

Na osnovu člana 16. stav 1. Zakona o Vladi Zeničko-dobojskog kantona-Prečišćeni tekst ("Službene novine Zeničko-dobojskog kantona" broj 7/10) i člana 41. stav (2) Zakona o dopunskim pravima branilaca i članova njihovih porodica ("Službene novine Zeničko-dobojskog kantona" broj 1/14), na prijedlog Ministarstva za boračka pitanja, Vlada Zeničko-dobojskog kantona, na 172. sjednici održanoj dana 10.07.2014. godine, d o n o s i

## **U R E D B U**

### **O NOVČANOJ NAKNADI DOBITNIKA RATNIH PRIZNANJA I ODLIKOVANJA ZA VRIJEME NEZAPOSLENOSTI**

#### **DIO PRVI - OPĆE ODREDBE**

##### **Član 1. (Predmet Uredbe)**

Ovom Uredbom utvrđuju se uvjeti, način i postupak ostvarivanja prava na novčanu naknadu za vrijeme nezaposlenosti dobitnika ratnih priznanja ili odlikovanja koji imaju prebivalište na području Zeničko-dobojskog kantona (u daljnjem tekstu: Kanton) i povratnika u Republiku Srpsku.

##### **Član 2. (Uvjeti za korištenje prava)**

Pravo na novčanu naknadu po ovoj Uredbi mogu ostvariti dobitnici ratnih priznanja koji su na evidenciji Službe za zapošljavanje Kantona kao nezaposlena lica, pod uvjetom da:

- a) imaju prebivalište na području Kantona neprekidno najkasnije od 07.02.2011. godine;
- b) su povratnici u Republiku Srpsku koji ostvaruju osnovna prava iz branilačko-invalidske zaštite u općinama Kantona ili su na evidenciji nadležnog organa za vojne evidencije u općinama Kantona.

##### **Član 3. (Korištenje pojma i dokaz statusa)**

Dobitnik ratnog priznanja ili odlikovanja, u smislu ove Uredbe je lice kojem je isto svojstvo priznato u skladu sa odredbama Zakona o posebnim pravima dobitnika ratnih priznanja i odlikovanja i članova njihovih porodica ("Službene novine Federacije Bosne i Hercegovine" broj 70/05, 61/06 i 9/10, u daljnjem tekstu: Zakon) a svoj status dokazuje rješenjem nadležnog organa o priznavanju prava na mjesečni novčani dodatak, izdatog u skladu sa odredbama Zakona.

##### **Član 4. (Visina naknade)**

Dobitnik ratnog priznanja ili odlikovanja, u skladu sa odredbama ove Uredbe, za vrijeme nezaposlenosti ostvaruje pravo na mjesečnu novčanu naknadu u visini od:

- a) 200,00 KM – dobitnik ratnog priznanja ili odlikovanja iz člana 5. stav (3) Zakona;
- b) 100,00 KM - dobitnik ratnog priznanja ili odlikovanja iz člana 5. stav (4) Zakona;
- c) 50,00 KM - dobitnik ratnog priznanja iz člana 5. stav (5) Zakona.

#### **DIO DRUGI - POSTUPAK OSTVARIVANJA PRAVA**

Član 5.  
**(Zahtjev)**

- (1) Zahtjev za ostvarivanje prava po ovoj Uredbi podnosi se nadležnoj općinskoj službi za poslove branilačko-invalidske zaštite u općini u kojoj dobitnik ratnog priznanja ili odlikovanja ima prebivalište, odnosno u kojoj ostvaruje prava iz branilačko-invalidske zaštite ili u kojoj se nalazi na evidenciji nadležnog organa za vojne poslove (u daljnjem tekstu: općinska služba).
- (2) Zahtjev iz stava (1) ovog člana podnosi se na posebnom obrascu kojeg propisuje ministar Ministarstva za boračka pitanja Zeničko-dobojskog kantona (u daljnjem tekstu: Ministarstvo) u roku od osam dana od dana stupanja na snagu ove Uredbe.

Član 6.  
**(Potrebna dokumentacija)**

- (1) Uz zahtjev za priznavanje naknade zainteresovano lice prilaže sljedeću dokumentaciju:
  - a) fotokopiju lične karte;
  - b) dokaz o statusu dobitnika ratnog priznanja ili odlikovanja (rješenje o ostvarivanju prava na mjesečnu novčanu naknadu po odredbama Zakona);
  - c) uvjerenje o prebivalištu.

Član 7.  
**(Provjera podataka)**

- (1) Općinska služba putem Službe za zapošljavanje Kantona vrši provjeru statusa dobitnika ratnog priznanja i odlikovanja kao nezaposlenog lica i o utvrđenom stanju obavještava Ministarstvo.
- (2) Općinska služba je dužna vršiti kontinuiranu provjeru podataka iz stava (1) ovog člana kvartalno i po zahtjevu Ministarstva i o svakoj promjeni obavijestiti Ministarstvo.

Član 8.  
**(Izdavanje rješenja)**

- (1) Rješenje o priznavanju prava na novčanu naknadu po ovoj Uredbi, odnosno odbacivanju ili odbijanju zahtjeva, donosi općinska služba, u roku od 8 dana od dana podnošenja zahtjeva.
- (2) O žalbi na rješenje općinske službe, rješava Ministarstvo.
- (3) Općinska služba dostavlja Ministarstvu primjerak konačnog rješenja o priznavanju prava po ovoj Uredbi.

**DIO TREĆI - ZAVRŠNE ODREDBE**

Član 9.  
**(Sredstva za ostvarivanje prava)**

Sredstva za ostvarivanje prava po ovoj Uredbi osiguravaju se u Budžetu Kantona u skladu sa prilivom sredstava, na budžetskoj stavci Ministarstva, a ista se doznačavaju općinskim službama u redovnim mjesečnim iznosima na osnovu dostavljenih rješenja o priznavanju prava, odnosno iskazanih potreba.

Član 10.  
**(Isplata i pravdanje sredstava)**

- (1) Na osnovu doznačenih sredstava za realizaciju prava po ovoj Uredbi, općinska služba vrši isplatu mjesečne novčane naknade korisnicima prava putem tekućih računa.

- (2) Općinska služba je dužna u roku od 15 dana po isplati naknade dostaviti Ministarstvu pravdanje utrošenih sredstava.

Član 11.

**(Evidencija i obrasci)**

Elektronsku evidenciju o podnesenim zahtjevima i korisnicima prava po ovoj Uredbi vode općinske službe i Ministarstvo, po posebnim obrascima koje propisuje ministar Ministarstva u roku od osam dana od dana stupanja na snagu ove Uredbe.

Član 12.

**(Stavljanje Odluke van snage)**

Danom stupanja na snagu ove Uredbe prestaje važiti Odluka o novčanoj naknadi dobitnika ratnih priznanja i odlikovanja ("Službene novine Zeničko-dobojskog kantona" broj 19/07 i 5/13).

Član 13.

**(Stupanje na snagu i objavljivanje Uredbe)**

Uredba stupa na snagu danom donošenja, a ista će biti objavljena u "Službenim novinama Zeničko-dobojskog kantona".

Broj: 02-\_\_\_\_\_/14.

Datum, 10.07.2014. godine

Zenica

**PREMIJER**

*Munib Husejnagić, dipl.ing.maš.*

DOSTAVLJENO:

1x Ministarstvo za boračka pitanja,

1x Ministarstvo finansija,

1x Službene novine Zeničko-dobojskog kantona,

1x a/a.